



Inkara

UMUSODA

Na

Duc Authentique

UMUSODA

Duc Authentique

© Copyright 2022— Duke Stories

Uburenganzira bwose burabitswe. Ntivyemerewe kugira kopi, gusohora canke gukoresha ukwarikwo kwose mu ntumbero yariyo yose iyi nkuru utabiherewe uruhusha n’umwanditsi nyeneyo ubwiwe.

Iyi nkuru irora ukuri kw’ubuzima bwa misi yose, ikaba yanditswe mu buryo bwo kwinezeroza igamije kwigisha, guhanura no gukebura ikibano n’abantu muri rusangi.

Iyi nkuru hamwe n’izindi nkuru zose zanditswe n’umwanditsi Duc Authentique, urashobora kuzironka zose vyoroshe kuri page y’inkuru yitwa “Duke Stories” ku rubuga hwaniro Facebook.

Edited by Duc Authentique

Cover design: Duc Authentique

Facebook: Duke Stories

Whatsapp: (+257) 71349267

Gmail: duccendrars@gmail.com

Ebook published by Duke Stories®

Bujumbura, Burundi

Ijambo ry'intango

“...biroroshe kwizera udukeranya ikintu wakuzze wumva bakwumvisha ijoro n’umutaga ariko kandi biratangaje ukuntu bashobora gushiruka umwete bakakubwirana ubushizi bw'amanga ko arikwo kuri kandi atacemeza canke icabona c’ivyo bavuga ariko ukabona ata gukeranya bafise.

Sinzi ko ari jewe nihenda ariko inyuma yo kuburira inyishu ibibazo igihumbi vyanca mu bwenge nahisemwo kwizera no kwemera ivyo mbonsha amaso yanje.

Isi nibiyiriko ndavyemera ariko uwatumye bibaho vyaranse ko ndamwizera kuko nimba ariwe yatumye bibaho ninawe atuma bigenda.

Nibaza ko ata ntumbero nziza iri inyuma y' ibiriho kuko vyose impera n’imperuka biruhira kuzimangana.

Maze ukuzimangana kwavyo kugasiga ibihengeri imibabaro n’uburibwe budasanzwe.

Iyo nza kugira amahitamwo nari guhitamwo kuvuka nd' impumyi kugira amaso yanje ntabone uwo musu, nari guhitamwo kuba ikitumva kugira amatwi yanje ntiyumve iyi inkuru,

Eka noneho iyo ngira ayo mahirwe nibimwe ntabajijwe, nari guhitamwo kutabaho, kuko

*kubaho...kubaho...ntansiguro bifise...nta namajambo
mfise...”*

1

Ayo niyo majambo nakunda kuvuga buri gitondo ukwo nahumura maso imbere yanje nkahabona ishusho yariteretse imbere yanje ku kabati kigitanda hariko ifoto iriko umugore wanje n'abana banje babiri.

Narambura ukuboko nkayitora nkayifata mu biganza nkatangura kubabona bariko barantwengera nanje nkasanga natwenze, intoki zanje zo ziguma zinyerera ku kiyo cari kiyifutse,

Ariko navuna urugohe hakanzamwo amashusho ari yo ntandaro ya vyose,

Nibuka uwo musu nuriye imodoka ku gicamusu nshugumbwa, akamwemwe kari kanganje, murabizi mwese uko umusirikare atahutse avuye ku rugamba amera.

Umuryango wari warambuze, nanje inzira yose nibaza uko baza kwifata bambonye.

Mwidirisha, ibiti n'imisozi vyaguma vyiruka gushika aho naboneye bihagaze, twari dushitse nca ndururuka nshira umuzigo wanje mu mugongo maze ntangura gutambuka ngenda ngana aho nasize urwanje ngiye kugwanira amahoro y' igihugu canje.

Ikirere casa neza, ku kirengazuba kwijuru naritegereza
nkabona ibara ry' umuco wizuba rirengera ingene wasa
neza nkavuga nti: *Umuremyi yar' umuhinga koko.*

Natambutse negera urupangu ariko natangejwe no
kubona kumwango w' urupangu hariko igufuri.

Umutima wanje warasimvye ku buryo budasanzwe
ntangura kwibaza ibibazo ntashobora kwiwishura.

Nararaba kudodora ku rupangu ruriko igufuri nkumva
ubwenge buravyanse haheze akanya nshira isakoshi
hasi nabona harabaye ishamba umenga ntabirenge
biherutse kuhaca.

Ndiko ndaraba aho nicara numvise ijwi ndarimenya
ryari irya Mbongo umubanyi yaje avuga cane nk'
uwutangaye ati: *Ntibishoboka!!!*

Nca ndahindukira ndamuraba nti: *Mbongo ibiki?*

Nawe: *Oya! Muhire???*

Jewe: *Ni jewe pe! Ndaje ndaje basha nuko gusa
nshikiye ku myugariro!*

Nabonye asubira inyuma yiruka nti: *Mbongo! Mbogo!
Garukaaa umbwire!*

Ariko yagumye yiruka arateba ashika aho amaso yanje
atamubona nca ntangura kugira amakenga!

Ku mutima nti: *Ndakwingize abe ari amahoro!*

Natanguye gucika intege ntazi ico bivuyeko nicara ku ruhande ndiruhutsa haheze akanya umutwe ndawubika mu maguru maze ishanete nari nambaye mwizosi irarekera yariko agasaraba kaguma karekera.

Ndiko ndakaraba nibutse umusi nari ngiye ku rugamba umugore amperekeje agenda ararira hageze ko dutandukana yarakambuye maze akanyambika mw' izosi aca arambwira ati: *Muhi, uragiye urabona aho unsize, ninagukumbura nzoraba Muhindo imfura yawe nzomubonamwo ishusho yawe nawe niwankumbura uzokore kuraka gasaraba uzoce wumva ukubaho kwanje kugukikuje atari kwizosi gusa ariko impande zose, uzokore ku mutima ukwo uzotera uzomenye ko aruwanje nanje nsigaranye rwawe.*

Mpeje kwibuka ivyo nakoze mu mufuko nkurayo urufunguruzo rwari ruriko akajouet gatoyi kimodoka ndakitegereje nca nibuka ndiko ndasezera Muhindo umuhungu wanje ico gihe yarafise imyaka itandatu aca ambwira ati: *Paa abana twigana bamye barambwira ko umusoda agiye ku rugamba atagaruka nivyo?*

Jewe: *Oooh oya Mon fils bakubeshe ushima nzogaruka urabona aka kajouet kawe ntwaye?! Nzoza ndakazanye...*

Nkiriko ndavyibuka ivyo numvise umuntu ankomye ku rutugu nca ndunamuka ndavye nca mbona Mbongo

ahagararanye na Minani nari narasize ari nyumba kumi nca ndahaguruka ndabaramutsa.

Nabonye Minani afata imfunguruzo yugurura urupangu ati: *Karibu mu rwawe! Muhire nubwo ukwo warusize atariko urusanze, warusize ari nyabagendwa ruvugirizwamo impundu none usanze ar' umusaka ata gakakaza.*

Jewe nubwoba bwinshi nti: *Ndabasavye mumbwire ivyabaye!! Nimba barantwaye umugore mbimenye nubundi ndamutahura usanga yararindiye arihebura kuko nta musoda yomara iyi myaka ata gakuru kiwe ngo yitegwe ari muzima ariko nimiburiburi mbwira aho ari nje kuraba abana banje, ubu ndibaza Muhindo na Muhizi barabaye abasore yooo diso ahubwo mbwira nyarutsa...*

Nabonye bakomeza guhora nca mfata Minani mw' izosi nshavuye nti: *Arhéee ndambiwe no kuguma ndababaza mutanyishura murambwira canke ntimumbwira?*

Nari numva umenga nobakubita kuko nabona arakagaye kubabaza ntibanyishure. Napfunze ingumu ngomba ndayirekure numva Mbongo aravuze ati: *Gomba wirekere nubundi...*

2

Arabandanya ati:

Numvise Mbongo avuze ati: *Gomba wirekere nubundi ntibari buzuke*

Jewe nca ndahindukirana ishavu ryinshi nti: *Uvuze ngwiki sha? Inde azuka?*

Minani ati: *Umva Muhire tekereza tukubwire neza kandi wihangane kuko inkuru ugira wumve siyo no kwipfuriza kwumvisha amatwi yawe!*

Twinjiye mu nzu dukunkumura inkugugu yari ku ntebe zari muri sallon maze turicara numva Minani arasubiye ati:

Umva rero Muhire burya umuryango wawe washikiwe n'uruva guhiga, umugore wawe n'abana bawe bagize impanuka mu modoka nta numwe yarokotse ubu haheze imyaka itatu ibara riguye...

Nakomeje kuvyanka babinsubiriramwo kenshi nza kuvyemera bagiye kunyereka aho bababitse, amaso yanje asoma amazina n'amatariki y' intango n'iherezo ry' ubuzima bw'umugore wanje n'abana ku misaraba ukwo yaritatu.

Ntakindi nakoze nabuze kurira mbura no gusara nca ndahindukira nsubira muhira maze mfata ikibiriti ndatsa umuriro ndomeka buri kimwe nca ndasohoka ariko ndiko ndasohoka nabonye ifoto yarimanitse ku ruhome yariko jewe umugore nabana babiri ndayitora ndasohoka nsiga inzu yose iriko iraka mpitana ya sakoshi nshiramwo ya foto nca ndagenda.

Ndiko ndagenda amajwi menshi yanca mu matwi ndetse n'amashusho menshi anca mu maso, aho nahindukiye ngenze kure ariko mbona inyuma umuriro ku mutima nti: *Umuriro udahera niwo njanye ku mutima, niteganye igishika umusi uzosha ugatongoka maze nkaja aho ntazokwibukwa nanje sinziyibuke.*

Ukwo nikwo najanye agahinda ntari narigeze menya ko kabaho kuva nakabaho,

Sinarinzi iyo ndiko ndaja ariko numva nshaka kuja ku mpera y' isi, numva nshaka ko isi yasama ikandotsa, numva nshaka kwitwa umuhisi canke uwutabayeho,

Niho nashitse ahantu ku musozi hejuru imbere harimanga maze nicara kwibuye nitegereza imbere ntangura kuvuga ya majambo:

Isi nibiyiriko ndavyemera ariko uwatumye bibaho ntibigikunze ko ndamwizera kuko nimba ariwe yatumye bibaho ninawe atuma bigenda.

Nibaza ko ata ntumbero nziza iri inyuma y' ibiriho kuko vyose impera n'imperuka biruhira kuzimangana.

*Maze ukuzimangana kwavyo kugasiga ibihengeri
imibabaro n'uburibwe budasanzwe...*

Ijoro ryarageze ijoro ririjima niho nabonye ko koko ata
muco amaso atakamaro agira ariko mwuwo mwanya
ico amaso yarakeneye ntiwarumuco!

Naraye nicaye ku manga niyumvira ukuntu nohagarika
ubwonko bukareka kuguma bunyereka kahise ariko
nabwo bwambereye ibamba bwanka kunyumvira
ahubwo ndushiriza kubona ubuzima bwose kuva ku
ntango.

Mu rukerera epfo numva amazi asuma, mu kirere
nkumva umuyaga uhuha ibiti bigatamba inyoni
zikaririmba.

Bwakeye niyumvira kwururuka umusozi ngo nje mu
gisagara ariko numva ntashaka kuja ahantu hari abantu
nca nigira inama yo kwinjira ikibira cari cuzuye
inyamaswa z' inkazi ariko nta bwoba cari kinteye kuko
urupfu ntaco rwari ruvuze kuri jewe.

Nakoze mwisakoshi ntora ya foto ndayisambura
nkuramwo ifoto yigipapuro yari indani maze
ndakizingira mumufuko nca ndagenda i sakoshi
nibirimwo ndabita aho.

Ukwo nikwo ninjiye mwishamba kuriyi ncuro ntagiye
kugwanira amahoro nkumusoda ariko ngiye kurondera
iherezo ry' ubu buzima butampiriye naho banyise
Muhire uwo musizi izina ntiryabaye muntu.

Natanguye kubaho kure y' abantu hafi y' ibikoko nubwo harimwo ibitinyitse nk' intambwe ingwe n'ibindi ariko narabishika imbere nkabona vyigiwe inyuma tuca tubana ukwo.

Ndibuka igihe kimwe nariko ndagendagenda mwishamba nca nshaka kuraba ahantu iryo shamba ryoba rigarukira niho nuriye igiti nabona cari kirekire cane nshika mu gasongero maze ntangura kwihweza hirya no hino aho nabonye ishamba atari rito, ariko nkiraba narabashije amaso hakurya nca mbona...

3

Narabishije amaso hakurya nca mbona imodoka iriko iragenda haheze akanya ica irahagara.

Nakomeje kuyiraba nsinzi ukuntu nimukiye kurindi shami ndaryicarako ariko nkiryicayeko numvise rivunitse nca ngerageza kuraba ico mfata ndakibura gushika aho namaze umwanya ndiko ndakoraka mva mugasongero gushika aho numvise nkubise umugongo ku kintu numva vyose birahagaze nasubiye gukanura ntibuka neza ivyabaye gusa ndibuka ko nisanze ndiko nenena kwishami ryari hafi yo hasi nca ngerageza kwihindukiza ariko ntaraheza naryonyene rica riravunika nca ntanguza umutwe hasi nca mpaguruka mbabaye cane ariko nca nibuka ko mperuka ndi mu gasongero mbonye imodoka nca ndibwira ko nshobora kuba nakorotse.

Nikabakavye umubiri wose numva meze neza nta musonga nca ndahaguruka ndikunkumura nerekeza iyo nari nabonye umuduga.

Narashitse nca mbona hirya y' umuduga hariho abantu bariko barubaka uduhema harimwo aba Papa n'aba Maman ndetse nabana bari mubigero

bitandukanye ariko kandi bo bari inyuma y' uruzitiro
rw' intsinga

Hari haheze igihe kirekire ntabona abantu kandi
sinavyicuza kuko nije nabihisemwo ariko numvise
noguma ndabaraba ivyo bigira.

Hageze amasaha yo ku mugoroba nabonye bose bagira
umuzingi batangura kuvuga ibintu ntari numva neza nca
ngerageza kuvunisha intoki udutsinga twari dukoze
uruzitiro gushika ndonse inzira ncamwo nca ndasoboka
ndabegera.

Nabonye umugabo umwe yarahagaze hagati muri bo
avuga ngo:

*Kera utarabaho Imana yarikuzi, yarizi ivyawe vyose,
yarizi ibikwerekeye vyose, ifise mu kiganza cayo
igicapo c'ubuzima bwawe bwose, ico ukwiye kumenya
nuko n'umushatsi uri ku mutwe wawe waharuwe!*

Jewe aho narindi nasanze navuze nti: *None bimaze iki
ivyoy vyose?*

Nza mbona bose barahindukiye bandabira rimwe
bakangutswe wa mugabo aca aratambuka aza angana
ati: *Halleluyaaah*

Bose bavugira rimwe bati: *Amen*

Aca arasubira ati: *Sinzi uwuriwe nigituma uri uwuriwe
ariko ndakubwira ko iyakubumvye ikuzi kandi
ikwitayeho!*

Naciye numva notwenga nti: *Mwese muribirofa
ntakindi norenzako!*

Naciye mpindukira ariko ngize ngo ngende numvise
umuntu amfashe ukuboko mpindukiye mbona
n'umugore akiri muto aca aravuga ngo: *Yesu
aragukunda cane...*

Sinzi ukuntu vyagenze ariko numvise umujinya uduze
ndibuka ko nabanguye ukuboko nsanga namukubise
ikofi aca arwa hirya ariko mpejeje kumukubita numvise
ukuboko kugagaye kwanka gusubira gukora ikintu na
kimwe.

Natanguye kwibaza ico mbaye maze ngerageza
kugukorako ariko nkumva umenga ntikuri kuri jewe
kuko sinakwumva ndagukozeko.

Nkiri murivyo numvise bose uhereye ku muto muri bo
gushika kuwukuze bariko bavuga mu rurimi ntumva
ntangira kugira ubwoba ariko nabonye wa mugore aza
arankorako kuri kwakuboko kuca gusubira kumera
neza.

Nabonye bikomeye nca ndababisa nsubira mwishamba
ariko nari numva ntatekanye muri jewe ku buryo vyanse
ko nja kure ariko nagumiye hafi aho batambona ariko
jewe narababona.

Nakomeje kwibaza nti: *Aba bantu ni bwoko ki koko?*

Inyuma y'imisi ingahe nabonye mu gatondo bose bavyuka mu ruhagarara babazanya basa nabafise ico barondera.

Sinumva ivyo bavuga ariko haheze akanya nabonye wa mugore aza yiruka arira agana ku ruzitiro hamwe nari naciye inzira ariko atarinjira haje uwundi mugabo aramufata ati: *Oya sigaho ntupime ngo winjire kuko habayo inyamaswa zikaze nimba udashaka ko zigutabagurira mu maso yacu.*

Yakomeje kumwiyaka arira ahamagara izina rya Isha gushika igihe bamutwaye bamwinjiza muri ya modoka hama mbona baguma bagenda bazunguruka barondera gushika bubirirako aho bwakeye mbona bazinduka basambura utuzu twamahema bari bubatse maze batekera vyose bashira muri wa muduga barurira baragenda.

Bamaze kugenda narasokorotse mu gisaka nari ninyegejemwo ndasohoka ndabaraba barenga nca nisubirira mwishamba ubuzima burabandanya.

Nasigaye numva umenga ndimwirungu ariko ngerageza kuvyirengagiza ndahaguruka mba ndatembera mwishamba namura amashindwe nirira sinzi ukuntu numvise imbwebwe zikuga cane mpindukiye nca mbona ahantu zirundanye nca nja kuraba ndazishikiye mbona zose zirirutse ariko ngira amatsiko yo kuraba ikintu cari kizikoraniye ariko ndavya nza mbona...

4

Arabandanya ati :

Nagize amakenga maze ntera intambuko ngo ndabe ico zari zishengereye ariko narahashitse mbona ikinogo carimwo umwijima ntabashije kubona na kimwe cari indani nca ndahindukira ndagenda ariko ntarashika kure numvise ikintu kinyagajeyo nca ndagaruka ndavuga:
shhhhhshhhhh

Ariko mbura ikivuga nca ndatora ibuye nkororerayo nza numva ijwi ryumwana yiyamiye nca ndavuga nkankama nti: *We sha urinde uriho ukoriki hiyo?*

Nzanumva aravuze ati: *Naguyeyo ibikoko biriko biranyirukako*

Jewe nti: *Yabone rero ubundi ninde yakubwiye ngo winjire ngaha mwiri shamba?*

Ntiyansubije nanje nca ndagenda ariko numvise atanguye kurira nca ndagaruka ndururuka indani cari ikinogo c'imetero nka zitanu ariko nticari cagutse namanuka nishimikije ku mpande ndateba ndashikayo ndamutora ndamushira ku bitugu nca ndasubira ndaduga ndamushikana hejuru nca ndamwegeka ku giti cari impande manza ndamwitegereza.

Nakomeje kumwitegereza ntangura kumubonamwo
Muhindo nca ndakangukwa nca ndahindukira ndagenda
nza numva wa mwana arasubiye kuniha kumbe naravye
kukirenge ciwe yari yavunitse nca nkura igitambara nari
nkenyeye mwizosi ndagitaburamwo kubiri nca
ndamuboha ku kuguru nca ndamubaza nti: *Wumva
umeze gute?*

Nawe ati: *Ni sawa urakoze...*

Jewe: *Harya bakwita gute sha?*

Nawe: *Ishatse!*

Jewe: *None ko nyoko yagusize urabona bigenda gute?*

Nawe: *Ndagumana nawe nimba ataco bigutwaye!*

Jewe: *Birakintwaye nyene kuko ntamwanya mfise wo
kukwitaho raba ufate inzira yakuzanye!*

Nawe: *Ntayo nibuka!*

Jewe: *Hmmm sawa biragusha!*

Nca ndahaguruka ndagenda nawe aguma ankurikira
acumbagira ndamwihoza amasaha akomeza kugenda
burateba burira.

Mwijoro naramwitegereje aho yicaye mbona atanguye
kujugumira nca ndatora amabuye abiri y' umujabu
nibishakara nguma ndayakubitana gushika umuriro
uraka nca ndamubwira yegera umuriro arota, ariko sinzi
ukuntu nitegereje inyuma yiwe nca ndagenda bukebuke

mu bubangutsi bwinshi ndayicakira mwizosi nca
ndayizana yarinzoka yagomba imukomore.

Narayifashe ndayikwega umutwe gushika ucitse nca
ndawuta maze umutumba ndawutungera ku giti maze
ntereka impande y' umuriro haheze akanya nshitura
agace gato ndamuhereza ararya aca ambwira ati:

Urakoze ariko nta munyu urimwo iyi ninyama y' iki?

Jewe nti: *Yincagwatsi!*

Nza mbona aradashwe aguma yihaga nca ndamwihoza.

Ukwo nikwo natanguye kubana mwishamba na Ishatse
umwana w' abandi ndamwigisha kubana n' ibikoko nti:

*Igikoko ukwiye gutinya co nyene n' umuntu kuko nta
gikoko kizokuryarya canke ngo kiguhemukire vyovyo
vyibanira mu mahoro...*

Imisi yaragiye iyindi iraza umusi umwe twakinye
umukino na Ishatse wo kwoga dusiganwa.

Rwari uruzi runini cane ariko bivanye nukuntu twari
twaramenye kwoga cane nta bwoba twagira, niho rero
uwo musu twagumye dusiganwa ariko ntanganzwa
n'ukuntu Ishatse yansinze nca ndamubwira nti: *Bravoo
urantsinze*

Ishatse: *Kera nahora nsiganwa na Maman muri piscine
nkamusiga aramazi adatembera none we niwe wonsiga
mu mazi yiruka nkuku?*

Jewe nti: *None Maman wewe uhuh ba usiganwe n' abagabo nkawe sha urekane n' abagore hahaha!!!*

Ishatse: *Hahah bisigura rero ko nawe urumugore ko nagusize hhh!!!*

Jewe: *Uvuze ngwiki wa mbwa we ngo nd' umugore!*

Yaciye yoga yiruka nanje ndamwoma inyuma gushikigihe twaserukiye ahantu turavye tubona hari ikaburimbo tuca turahagarara.

Nza numva Ishatse aravuze ati: *Wow ibarabara!!!*

Jewe nari numva ataco bimbwiye nti: *None? Ushaka kugenda genda!*

Tuca tuva muruzi twicara ku nkombe aca atangura kuvuga ati:

Nari ngiye kwishure umusi numva Papa angarura ambwira ko agomba ansezere agiye ku rugamba, yansezeraniye ko azogaruka ariko iryo sezerano ryapfuye umusi inkuru insanga kwishure aho bambwiye ko mumazina bavuze mu makuru yabasoda bahitanywe n' igitero irya Papa baryumvisemwo.

Maman yakomeje kundemesha nubwo nawe nyene yaratuntuye ambwira ko nubwo mbuze Papa nkiri muto ntabuze ba Papa, ko aho nzoja hose nzobabona uhereye kuri we.

*Ndabizi ko udakunda abana ariko kuri jewe imisi
tumaranye ndagufata nka Papa kuko wambereye aho
atari inyuma y' amasezerano yose yari yangiriye.*

*Muhira ndakwinginze naho woba utigeze ugira abana
ngo bakuryohere ariko...*

*Ataraheza namucimwo nti: Ziba Isha kuko ntuzi ivyo
uriko uravuga*

Numvise ankonze mu nkovu,nibutse ko aya mango mba
ndikumwe numuryango nkabandi mu gishingo co kuba
inyeshamba.

Nasanze amasozi yakorotse ndabimenyeshwa nintoki za
ishatsi numvise zimpanagura kwisura nza numva...

5

Arabandanya ati:

Nagiye numva Ishatse apfukamyeye avuga ngo:
Ndakwinginze emera umbere Papa !

Naramwitegereje antera akagongwe nca
ndamuhagurutsa nti: *Haguruka tugende kuraba Nyoko
ubu agahinda kari mu kumwica kuko azi ko wapfuye.*

Twaciye duhaguruka turaduga duhagarara kwibarabara
tuza turahagarika imodoka zose tubonye dusaba
batwunguruze badushikane mu gisagara ariko kubera
ukuntu twasa nabi twambaye ibishambara
nkinyeshamba nyene, imiduga yose yarengana
yaducako yirenganira kandi nanje narabitahura kuko
twasa nk' abasazi.

Haheze umwanya utari muto tuza twarambiwe haje
ikiduga gipakiye imifuko y' amakara ndambika ikiganza
mbona iduciyeko ariko ageze imbere aca arahagarara
tuca twirukayo.

Narashitse mbona kuri volant ikigabo c'ubwanwa
bwinshi caraba nabi cirabura nza numva kivuze
gikankama kiti: *Vipi zenu nyinyi?*

Jewe: *Poa mzee tunakuomba utufikishe mjini!*

Nza numva kiravuze ngo: *Jiangalie kwanza muone jinsi mnafanana hmm!*

Aca arimyoza yongera ati: *Hivi kweli hamuko wizi nyie?*

Jewe: *Apana mzee ni kupigua na maisha tu vinginevyo hatuko watu wabaya!*

Mbona haheze umwanya yiyumvira ati: *Basi muko na ngapi?*

Jewe: *Hatuna franga baba, basi situnaenda kuzisaka mjini! Tusaidiye Mungu atakubariki!*

Nabonye ko iyo usaba ataco utavuga navuze Imana nibuka ko ntayizera nca ntwengera ku mutima nongera nibuka ko jewe kuva kera ata giswahili niyemerako ariko mwuwo mwanya natangajwe nukuntu nariko ndakivuga vyakomeye.

Nza numva aravuze ati: *Fanya mbio mbio mupande pale nyuma alakini msidhani eti mtaenda hivo.*

Twuriye inyuma tugenda twicayeku mifuko y' amakara gushika dushitse mu gisagara aho twashitse twirabura neza atanuwotumenya ariko ntaco vyari biditye.

Twururutse tugiye gushimira ca kigabo kica kidutegeka gufasha abapakururura nya mifuko yamakara turabikora duhejeje dufata inzira Ishaatse agenda aranyereka aho

duca gushika igihe twashikiye ku rugo rumwe
turadodora haca haza kwugurura umuhungu umwe.

Ishatse yagiye kwinjira ariko aramutangira ati: *Uja he
ga wa mayibobo we?*

Ishatse ati: *Uranyise mayibobo sha?*

Nya muhungu ati: *Hoci genda canke naho nzane
ikibando !*

Haheze akanya twumvise ijwi ry' umugore avugira
indani twumva aza ku mwango ati: *N'amaki ga théo izo
mduru numva niziki?*

Aca araza wa muhungu ati: *Ni babasuma!*

Agiye kwugara aca aramutangira naciye ndamumenya
kuko yarumwe nakubita ikofi ati: *Oya sigaho kuba
ucira imanza abo ubonye bose, aburahamu yakiye
abashitsi arabagaburira atazi ko arabamalayika!*

Ishatse yaciye avuga ati: *Maman!*

Tuza tubona arakangutswe ati: *Uvuzee?*

Ishatse ati: *Ni jewe Maa!*

Twagiye tubona ahenutse agomba yiture hasi nca
ndamufata Ishatse yari yatanguye gukoma induru arira
ngo: *Maman arapfuye!*

Nti: *Humura ntaco abaye ahubwo zana amazi!*

Namuteruye ndamutwara muri sallon ntora igitambara ndamupepera nza numva umuntu amfashe ukuboko mpindukiye nsanga ni wa Muhungu

Théo aca avuga ati: *Nimugende rero canke mpamagare police*

Numvise ishavu riduze kuburyo natereye igitambara hasi nca ndamufata mwizosi hafi kumuniga ndamuzungurutsa ndukubita kuruhome nti: *Umviriza rero sha musore nimba nyoko atakwigishije kugira ico wubaha jewe ndashobora kubikwigisha!*

Twagiye twumva wa mugore akoroye nca ndamurekura bihurirana na Ishatse azamyeye akirahuri c' amazi turamuhereza aranywa haheze akanya aca aricara azenze amosozi mu maso ati: *Isha mbwiza ukuri ni wewe canke ndarota?*

Ishatse: *Reka basi Maaa nje kwihumura uce undaba neza.*

Nawe ati: *Oya nijwi ndumva ariryo egera hano !*

Bahoberanye barira bose haheze akanya nca ndavuga nti: *Sawa rero jewe ndagiye !*

Nza numva Ishatse aravuze ati: *Oya reka mbanze ndamubwire Maman uwuriwe*

Ishatse yatanguye kumubwira vyose yahejeje mbona Maman Bruce apfukamyeye imbere yanje anshimira ariko ndamuhagurutsa nti: *Ntaco bitwaye.*

Bansavye kuhaguma kuko Maman Bruce yaciye ategura umusi mukuru atumira incuti n'abagenzi natwe tuja kwoga mvuyeyo nsanga impuzu kugitanda mu cumba bari banyeretse nca ndazambara.

Uwo musi waruryoshe ku muryango wabo nubwo jewe ataco vyari bimbwiye nagumye nihoreye niho mu nyuma numvise umuntu ankozeko ati: *Nitwa Nick numvise baguma bakuvuga ariko ntaco wigeze uvuga?*

Jewe: *Nuko bidakenewe*

Ati: *Nitwa Nick nkora kuri Ishimwe Magazine ndipfuza ko umusi umwe woba umutumire ukatuyagira ubuzima bwawe!*

Sinamwishuye nagumye nihoreye.

Bwarije barataha twese tuja kuryama inyuma y' igihe kitari gito nsubira kuryama mu nzu nkabantu.

Nitegereje imbere mbona ifoto ya Yezu nca ndayisambura ndayikuramwo nca nshiramwo iyo nari mfise mu mufuko yumugore wanje n'abana banje.

Nca ndaryama mvugira ku mutima nti:

Kwisi vyose n'ubusa.

Haheze akanya mu buryo ntazi numvise ijwi rimpagara inyuma yanje riti: *Muhire Muhire! Kuki buri gihe unyidogera?*

Narahindukiye mbona umugabo akayangana ariko isura yiwe amaso yanse kuyibona kuko yaka nkizuba nca ndibwira nti: *Wosanga mbonye Imana*

Kuri jewe kari akaryo keza ko kuyibaza ibibazo nti: *Kuko unyanka?*

Nagiye numva avugana ikiniga ati: *Ndagukunda Muhire kandi ni kubwawe wenyene nshobora guhagarika vyose kugira ndakwiteho!*

Jewe: *Hmm wamtwaye umuryango ubu naho uraje?*

Yankoze ku maso nca ntangura kubona imbere yanje nkuwurodera ireresi.

Natanguye kwibona nkiri umwana umusi imodoka yangonga ikanca hejuru ariko natangajwe no kubona hari umugabo yaciye anryama hejuru imodoka iba ariwe icako nza numva wa mugabo aravuze ati: *Harya nije nakurinze!*

Nasubiye kubona umugore yakora mwirestaurant iri hano nakunda kuja gufunguramwo ariko ashira ibintu vyibifu vyirabura mwisahani yagira anzimane ariko ntarabirya nabonye ibiganza bikayangana biri hejuru yisahani bitangira vya bifu rya jwi rirasubira ati: *Aha nagukingiye uburozi wari wateguriwe!*

Nca nsubira kubona ndi kurugamba ahantu twatewe bombe ariko nkarokoka jenyene mubo twari kumwe

nongera kubona ko kandi ari wa mugabo akayangana yabujije uburyi bwibombe kunshikira.

Nasubiye kubona abagabo bari bambaye ibintu vyirabura bari ahahoze ari mu rugo rwanje nza numva ijwi rya wa mugabo riravuze riti: *Aba bari bateguye gufata ku nguvu umugore wawe no gusiga bamwicanye nabana rero nabiye gereje kare ndabarinda ako kaga.*

Naciye ndababona hejuru mu bicu bantwengera nza mbona barampepeye ibiganza banezerewe!

Wa mugabo aca aravuga ati: *Muhire nakurinze incuro nyinshi ntodondagura ngo mpeze! Wibuke uja mwishamba ryuzuye inyamaswa zinkazi ariko nti hagire nimwe inakurya urwara, wibuke ukoroka ku giti kirekire ariko nti hagire nigufa na rimwe rivunika; Muhire ndagukunda cane kurusha ukwo wokwibaza.*

Nabuze ico ndenzako nca ndapfukama ndarira nsaba ikigongwe nti: *Yesu mbabarira!*

Aca aravuga ati: *Genda ubwire bose ko ndabakunda kuko muri jewe nta kindi kingize atari urukundo.*

Naciye nikangura nsanga bwakeye nca ndavyuka ndihumura nja muri sallon nca nsanga Ishatse na Maman wiwe bapfumbatiranye bavugana ariko ntibari bambonye numva Ishatse avuze ati:

*Iyaba vyakunda Muhire yogumanye natwe kuko
ndamukunda nka Papa wanje ikibazo nuko adakunda
abana kandi atemera Imana!*

*Nza numva Maman wiwe nawe aravuze ati: Iyaba
vyakunda nonuretse akaja mu kibaza so yahozemwo
kuko inyuma y' iyi myaka niwe Mugabo mbonye
umutima wanje ukamushima...*

IHEREZO

Akajambo ka nyuma

Sinzi ubuzima ushobora kuba uriko uracamwo uno
musi ariko birashoboka kuba utariko uratahura
impamvu y'ibimaze kukubako canke ibiriko birakubako
ariko numva nshaka kukubwira ngo ntibigutume
widogera Imana kuko yoyo ntiyihenda kandi ivyo ikora
vyose ni vyiza kuko ibikora mu rukundo, kimwe gusa
ubwenge bwacu nibutoya cane ku buryo budashobora
gutahura vyose ariko muri vyose na hose izere Imana
nayo izokugirira neza murakoze.